

PHILIPPE par la grace de Dieu Rois de France & de Navarre, au Baillif de Senliz, ou son Lieutenant, *Salut*. Desierranz la pais & la tranquillité de nostre Royaume, voullans pourveoir & contraitier aux perils, qui pourroient damager, & donner occasions *de troubler la paix*, & la *seurté* de nostre pueple, laquelle nous querons & desierons à avoir, garder & maintenir, à la loange de Dieu, par tout nostre Royaume, à la fin que droiture & justice soit miex gardée, & le *saint voyage d'outremer*, que nous à l'aide de Dieu, & de l'Eglise & de nos feaux amis, & sougiez avons *empris* en nostre propre personne, soit, & puist estre parfaiz sans detourbier. *Pensanz* que pour *les Tournois*, & les *joustes* que aucunes personnes de nostre Royaume veullent maintenir & exercer, ledit voyage d'outremer, que nous avons tant à cuer, & chascun doit avoir, pourroit estre delayez, non sans offense de Dieu, & la paix & la seurté de nostre peuple troublée, *considerans* que pour espargner les fraiz & les mises qui sont faiz & qu'il convient à faire esdites *joustes & tournois*, ledit saint voiage pourroit estre avanciez au plaisir & honneur de Dieu. *Nous ensuivans* les bonnes cuvres de nos predecesseurs, eüe deliberation seur ce, pour ledit voiage approcher, & la paix & la seurté garder & maintenir, sans laquelle ledit voiage ne pourroit estre parfaiz, & le damage d'eus & de nos sougiez eschiver, lesdites *joustes & Tournois suspendons & deffendons* par tout nostre Royaume, jusques à nostre volenté, *Si vous mandons*, que vous de par nous *faciez crier* par tous les lieux de vostre Baillie, où vous verrez qu'il sera à faire, *que nuls ne soit si hardi, sus paine d'encourre nostre indignation, d'aller à joustes, ne à tournois, ne de joster, ne tournoier d'ores-en-avant durant nostredite deffence*, & que *il gardent leur armeures & chevaux*, si que il soient & puissent estre pris & appareilliez à ce que nous avons à faire pour ledit voiage exaucier, & la paix, seurté & justice entre eus sougez garder, & adrecier, à la loenge de Dieu, & au profit commun, & en telle maniere le facent, & si *se tiengnent garni de chevaux & d'armeures*, que des maintenant il soient tuit prest, & appareilliez de venir à nostre Mandement, toutesfois que il seroit mestier pour la paix de nostre Royaume maintenir & deffendre. Et deffendez à toutes les bonnes Villes de vostre Baillie, que il sus poine de quanque il se pevent meffaire envers nous, ne *hebergent*, ne *hostellent*, & ne reçoivent en leurs maisons, hostieux, ou manoirs nulles personnes, de quelque condition qu'il soient, qui iroient ou vendroient *aufdites joustes ou Tournois*, contre nostredite deffence. Et de tous ceus que vous pourrez trouver, allanz, venanz, ou retournanz desdites joustes & tournois saisifiez, & arrestez & prenez harnois, chevaux & armeures, & tenez en nostre main, sans delivrer & sans recroire, fors que par nostre especial mandement. *Donné à Bourges le premier jour d'Avril, l'an de grace mil trois cens seize.*